

四庫全書

子部

欽定四庫全書

子部
冊府元龜卷三十六

詳校官中書臣瞿照

員外郎臣牛稔文覆勘

總校官庶吉士臣何思鈞

校對官中書臣鮑之鍾

膳錄監生臣蔡齊明

膳錄監生臣黃鑫

欽定四庫全書

冊府元龜卷三十六

宋 王欽若等 撰

帝王部

封禪第二

唐高宗即位後公卿數請封禪龍朔一年十月癸丑詔
宜以四年正月有事於泰山所司詳求故實務從折衷
仍以來年二月幸東都

十二月戊申詔曰海東二蕃久愆職貢近者命帥薄伐

軍務事殷緣河州縣勞於征役比雖多有蠲免庶事優
矜萬邦俱會恐致煩擾勞逸二途理無兼遂介丘大禮
及辛都並宜且停

麟德元年七月丁未朔詔宜以三年正月式遵故實有
事於岱宗所司詳求茂典以從折衷其諸州都督刺史
以二年十二月便集嶽下諸王十月集東都緣邊州府
襟要之處不在集限天下諸州明揚才彥或銷聲幽藪
或藏器下僚並隨嶽牧舉送

九月乙丑詔曰來年行幸岱宗州縣不得浪有煩擾其
水淺可涉不可繕造橋梁所行之處亦勿開道路諸州
及寺觀并百姓不得輒獻食

二年十月丁卯帝發東都赴東嶽從駕文武兵士及儀
仗法物相繼數百里列營置幕彌亘郊原突厥于闐波
斯天竺國屬賓烏菟崑崙倭國及新羅百濟高麗等諸
蕃酋長各率其屬扈從穹廬氈帳及牛羊駝馬填候道
路是時頻歲豐稔斗米至五錢豆麥不列於市議者以

為古來帝王封禪未有若斯之盛者也十二月丙午至齊州停十日丙辰發靈巖頓至於太嶽之下庚申帝御行宮牙帳以朝羣臣

乾封元年正月戊辰朔有事於泰山親祠昊天上帝於封祀之壇己巳帝登於泰山封玉牒於介丘庚午降禪於社首山皇后為亞獻越國太妃燕氏為終獻先是李勣許敬宗等議封禪儀注請以高祖太宗二座俱配昊天上帝表曰臣聞殷薦上帝事有明文祖宗並列抑惟

通軌雖三五以降損益不同漢魏以還沿革殊致至於
帝郊嚴配之儀尊祖敬宗之典固以因心弘範緣情作
則孝思聖敬迴冠往初茂實宏規遂高終古伏惟高祖
太武皇帝改物創業撥亂反正受終明三統之歷執競
隆七百之基御極垂衣稱物平施隨山靜稽天之浸授
首撲燎原之災玄功暢於六虛聖績覃於四海巍巍蕩
蕩無得而稱太宗文皇帝鑿乾履度括地提衡翦修蛇
於洞庭戮蚩尤於中冀戡召雨追風之孽軼斷鼉練石

之勤微禹之功用軫宣尼之歎曰文之德實符姬旦之
時獻智神武含弘光大深居高視懷日月以炤臨剛健
柔明體乾坤之博厚求賢勞於宵夢拜善急於朝飡摠
宇宙以彌綸運陰陽而陶鑄變澆偽於華胥之俗還淳
朴於大庭之辰九譯同文八荒順軌人神以合祥瑞畢
臻巢鳳下窺遊麟易擾山車澤馬遠服瑤池之駕醴泉
甘露近充上壽之尊優遊垂拱制禮作樂遠鏡百王獨
為稱首再造區夏重宸極昊天成命二帝受之升降

節文不宜差別而肅恭禋祀綴兆分位升中告禋天地
別饗乖嚴父配天之文失尊親加隆之數今歸功宗嶽
請以二帝並配竊以太穆皇后造舟備禮爰定厥祥處
人倫之經居風化之始追蹤文母播美周姬文德皇后
倪天作合曾沙表慶功侔十亂化被二南兩聖既已配
封則二后應須配禋申宸思淳深之極弘聖朝敬愛之
旨自我作古聞之往策周制所定夫何足云斯乃振揚
休烈昭宣懿範請存乎不刊永貽來葉詔從之又皇后

武氏上表曰伏以封禪舊儀祭皇地祇以太后昭配皆以公卿行事以妄愚誠恐未周備何則乾坤定位剛柔之義已殊經禮載陳中外之儀斯別豈有推尊先后而以宰臣參祭詳求至理有紊徽章妾望以展禮之日摠率六宮內外命婦親臨奠獻以申如在之敬詔許之壬申御朝覲壇受朝賀大赦癸酉帝謂羣官曰升中大禮不行來數千載近代帝王雖稱封禪其間事有不同或為求仙克禋或以巡遊望拜皆非尊崇祖業近在隋朝

喪亂最甚老小填溝壑少壯染兵鋒高祖發自晉陽撥
亂反正先朝躬擐甲冑贊成大業掃除氛祲廓清區宇
遂得四海宅心萬方仰德朕丕承寶厯十有七年終日
孜孜夙夜無怠屬國家無事天下太平華夷乂安遠近
輯睦所以躬親展禮褒贊先勲情在歸功固非為己遂
得上應天心下允人望今大禮既畢深以為慰公等休
戚是同故應共有此慶欲與公等飲饌盡歡各宜在外
更衣即求相見仍勅所司撤幄帳施玉床三品已上升

壇四品已下縱列坐壇下從酒設樂羣臣及諸嶽牧競
來上壽起舞日晏方止戊寅詔兗州置寺觀各三所觀
以紫雲仙鶴萬歲為稱寺以封巒非烟重輪為名丙戌
發自泰山改號封祀壇為舞鶴臺介丘壇為萬歲臺降
禪壇為景雲臺以祀日各有靈鶴及山呼萬歲之瑞故
也

上元三年二月詔以今冬有事於嵩嶽令所司草儀注
務從典故閏二月詔以吐蕃犯塞停封嶽

調露元年七月詔以今年冬至有事嵩嶽宜令禮官學士等詳定儀注

十月庚申詔以突厥背誕其冬至於嵩山封禪宜權停永淳二年七月庚申詔以今年十月有事於嵩嶽宜令禮官學士等審定儀注務展誠敬仍令天下嶽牧及京官五品以上各舉所知有孝行儒學文武之士於是詔禮官議射牛之事太常博士裴守真奏議曰據周禮及國語郊祀天地天子自射其牲漢武唯封泰山令侍中

儒者射牛行事至於餘祀亦無射牲之文但親春射牲
雖是古禮久從廢省不可復行據封禪祀禮日未明十
五刻宰人以鑿刀割牲質明而行事比鑿駕至祠所宰
牲總畢天皇唯奠玉酌獻而已若今祀前一日射牲事
即傷早祀日方始射牲事又傷晚若依漢武故事即非
親射之儀事貴隨時不可行用神功破陣樂及功臣慶
善樂二舞每奏上皆立對守真又議曰竊惟二舞肇興
謳吟攸屬贊九功之茂烈叶萬國之歡心義均韶夏用

兼賓祭皆祖宗聖德而子孫享之詳覽傳記未有皇王
立觀之禮况升中大事華夷畢集九服仰垂拱之安百
蠻懷率舞之慶陶甄化育莫匪神功豈於樂舞別申嚴
禁臣等詳擬奏二舞時天皇不合起立詔並從之尋以
帝不豫改用來年正月行封禪之禮十月癸亥車駕奉
天宮十一月丙戌詔曰朕聞仁者德之本叶亭育之至
途禮者道之末乃帝王之餘事厯選往初詳觀曩躅惻
隱以孚其化變通以會其神朕以虛薄祇膺寶位肝食

宵衣懼忝於宗社如傷若厲佇濟於黎元每以皇基肇
闢範圍覆載遺惠所覃昭格區宇虔荷靈命嘗慮下虧
鴻業遍刊羣嶽不足上報立功已升聞於日觀思欵謁
於天臺志在告成諒非為己屬今茲豐稔方有事於嵩
丘崇累聖之丕績祈兆人之嘉佑頃者分使出巡存問
風俗河南河北尚有十餘州旱澇加以朔方寇盜時或
侵邊關內流離未能復業一物失所獨甚納隍數郡不
寧豈宜備禮前欲以來年正月封中嶽者宜停

高宗自
東封之

後天后盛勸行中嶽之禮頻下詔皆屬年飢又蕃夷寇邊而輟於嵩山之下營奉高宮以為有事之漸

玄宗開元十二年閏十二月辛酉文武百官吏部尚書裴漼等上請封東嶽曰臣聞道協乾坤聖人之玄德功存禮樂王者之能事故旁徵前載博考鴻名躬歷數之期遇天人之應莫不發號施令升中合符澤浸黎元以茂聲實者矣伏惟開元神武皇帝陛下握符提象出震乘圖英威邁於百王至德加於四海梯航接武畢盡戎夷之獻耕鑿終歡不知堯舜之力惡除氛沴增日月之

光輝慶襲休榮雜烟雲之氣色靈物紹至休祥沓委江
茅將鄙黍均芳雙船與一莖齊烈固可以稽典訓設壇
場悉符瑞之美答神祇之貺謙而不發雖在於聖心理
則難辭孰違於天意臣幸遭昌運謬齒周行咸申就日
之誠願覩封巒之慶無任勤懇之至謹於朝堂奉表陳
情以聞帝手詔報曰自中朝有故國步艱難天祚我唐
大命集於聖真皇帝朕承奉丕業十有餘年德未加於
百姓化未覃於四海將何以擬洪烈於先帝報成功於

上玄至若堯舜禹湯之茂躅軒后周文之懿範非朕之
能逮也其有日月之瑞風雲之祥則宗廟社稷之餘慶
也天平地成人和歲稔則羣公卿士之任職也撫躬內
省朕何有焉難違兆庶之情未議封崇之禮甲子侍中
臣乾曜中書令臣說等奏臣聞自古受天命居大寶者
必登崇高之丘行封禪之事所以展誠敬報神祇三五
迄今未之闕也是以高宗因武文之業盛岱亭之禮方
冊所記虞夏同風聖移三朝年經五紀封崇之典缺而

未修山川望幸屬在今日陛下靖多難尊先朝天所啓也承大統臨萬邦天所命也焉可不陟東岱禪云亭報上玄之靈恩紹高宗之洪烈則天地之意宗廟之心將何以克厭哉且陛下即位以來十有四載創九廟禮三郊大舜之孝敬也敦九族友弟兄文王之慈惠也卑宮室菲飲食夏禹之恭儉也道稽古德日新帝堯之文思也憐黔首惠蒼生成湯之深仁也化玄漠風太和軒皇之至理也至如日月星辰山河草木羽毛鱗介窮祥極

瑞蓋以薦至而為常衆多而不錄正以天平地成人和
歲稔可以報於神明矣鴻生碩儒上章奏而請封禪者
前後千百聖情撝揖天鑒未回臣等仰考神心傍採衆
望封巒展禮時不可抑陛下縱不欲以成功告天豈不
可以天休報德臣等昧死上請以聞帝手詔報曰夫登
封之禮告禪之儀蓋聖人之能事明王之盛業也朕以
眇身託王公之上夙夜祗懼恐不克勝幸賴羣公以保
宗社至於休徵符瑞皆先帝遺慶朕何賴焉豈可以禮

百神觀羣后備岱亭之禮展封祀之儀者哉雖誠請是
違而宿心未暇臣乾曜說等又上言曰臣等考天人之
際稽億兆之情以為治定功成登封告禪鴻名盛則屬
在聖明陛下讓德冲深未允羣議神祇缺望臣等懼焉
且今四海和平百蠻率職莫不含道德之甘實咀仁義
之馨香是以上帝聿懷名山望幸珍符薦至年穀屢登
開闢以來未之有也臣聞自古受命而封禪者七十二
君安有殊風絕業足以方今也然猶躡梁父登泰山飛

英聲騰茂實而陛下功德之美符瑞之富固以孕虞夏
含殷周矣有何退讓逡巡於大禮哉夫昭報天地至敬
也嚴配祖宗大孝也厚福蒼生博惠也祭榮紀號丕業
也陛下安可以闕哉况天地之符彰矣祖考之靈著矣
蒼生之望勤矣禮樂之文備矣陛下安可以辭哉故臣
等願因神祇之叶贊順華夏之懇誠早稽舊章特垂新
詔庶幾仲夏乘農之隙以展巡狩肆覲之儀則天下幸
甚臣等昧死重請以聞帝又詔報曰夫治定然後制禮

功成然後作樂朕承奉宗廟恐不克勝未能使四海又
安此治未定也未能使百蠻效職此功未成也焉可以
揚景化告成功雖欲答於神祇終候安於兆庶再省誠
懇惻怵良深乾曜說等又再上言曰臣聞聖人者與天
地合德故珍符休命不可得而辭鴻名盛典不可得而
讓陛下功格上天澤流厚載三五之盛莫能比崇登封
告成理叶幽贊故符瑞異臻天意也書軌大同事也
菽粟屢登和平也刑罰不用至理也今陛下稽天意以

固辭違人事以久讓是和平而不崇昭報至理而闕薦
祖宗億兆之情猶知不可况上帝臨炤神宗顧諟其可
止乎願納王公卿士列嶽縉紳之望迴命有司速定大
典臣等不勝懇切敢昧死再拜上請以聞時儒生墨客
獻賦頌者數百計帝不得已而從之丁卯下詔曰自古
受命而王者曷嘗不封泰山禪梁父答厚德告成功三
代之前率繇斯義自魏晉已降迄至周隋帝典闕而大
道隱王綱弛而舊章缺千載寂寥封崇莫嗣物極而復

天祚我唐武文二后應圖受錄泊于高宗重光累盛承
至理登介丘懷百神震六合紹殷周之統接虞夏之風
中宗弘懿鑠之休睿宗穆粹清之道巍巍蕩蕩無得而
稱者也朕昔戡多難稟略先朝虔奉慈旨嗣膺丕業是
用創九廟以申孝敬禮二郊以展嚴禋寶菽粟於水火
捐珠玉於山谷兢兢業業非敢追美前王日慎一日實
以奉遵遺訓至於巡狩大典封禪鴻名顧惟寡薄未遑
時邁十四載於茲矣今百穀有年五材無眚刑罰不用

禮義興行和氣氤氳淳風淡泊蠻夷戎狄殊方異類重
譯而至者日月於闕庭竒獸神禽甘露醴泉窮祥瑞
者朝夕於林籩王公卿士罄廼誠於中鴻生碩儒獻其
書於外莫不以神祇合契億兆同心斯皆烈祖聖考垂
裕餘慶故朕得荷皇天之景祐賴祖廟之介福敢以眇
身而顯其讓是以敬承羣議弘此大猷以光我高祖之
丕圖以紹我太宗之鴻業永言陟配祇感載深可以開
元十三年十一月十日式遵故實有事泰山所司與公

卿諸儒詳擇典禮預為備具勿廣勞人務存節約以稱
朕意所緣封禪儀注兵馬陪集並皆條奏布告遐邇

十三年四月乙丑撫州三脊茅生有上封者言曰昔齊
桓公九合諸侯一正天下將欲封禪問於夷吾夷吾對
曰江淮間三脊茅生用以縮酒乃可封禪其時無茅桓
公大慙而罷自歷千古始一生昔宣王南征責楚包
茅不入王祭不供則是其地其茅今高一尺至上八月
長足方堪縮酒特望聖恩至時令采用祭太山并掘根

於苑內植之時宰臣已遣使於岳州採沅江茅乃奏曰
管夷吾為桓公是諸侯不合封禪故稱茅以拒之及伐
楚之日尊周室行霸道乃責楚云包茅不入王祭不供
若以茅為瑞是不知經義臣等歷任荆楚博訪貢茅沅
江最勝臣已牒岳州取訖今稱撫州有茅請移根入苑
且貉不踰汶橘不過江移根苑中信是虛語望勅撫州
且進六束與沅江相比用之帝曰可癸酉詔朝集使各
奉所部孝悌文武集於泰山之下

八月己未以封禪之故詔中書令張說右散騎常侍徐
堅太常卿韋縉秘書少監康子元國子博士侯行果等
與禮官於集賢書院刊撰儀注張說謂徐堅韋縉等曰
乾封舊儀禪社首享皇地祇以先后配饗王者父天神
而母地祇雖當今皇母位亦當往帝之母也子配母饗
亦有何嫌而以皇后配地祇非古之制也天鑒孔明福
善如響乾封之禮文德皇后配皇地祇天后為亞獻越
國太妃為終獻宮闈接神有乖舊典上玄不祐遂有天

授易姓之事宗社中圮公族誅夷皆由此也景龍之季
有事園丘韋氏為亞獻皆有婦人升壇執籩豆滌黷宮
蒼享祀不潔未及踰年國有內難終獻皆受其咎掌座
齋郎及女人執祭者多亦天卒今主上尊天敬神事須
革正斯禮請以睿宗大聖真皇帝配皇地祇侑神作主
及定儀奏聞帝從之張說徐堅康子元等又建議曰臣
等謹按顯慶年禮部尚書許敬宗因修禮奏改燔柴在
於祭前狀稱祭祀之禮必先降神周人尚臭祭天則燔

柴者臣等按禮迎神之義樂六變而天神降八變而地祇出九變則人鬼可得而禮矣則降神以樂周禮正文非謂燔柴以降神也按尚臭之義不為燔之先後假如周人尚臭祭天則燔柴則殷人尚聲何聲可燔先迎神乎又按顯慶中無忌等奏晉氏之前猶遵古禮周魏以降妄為損益者今按郭璞晉南郊賦及注爾雅祭後方燔又按宋志所論亦祭後方燔又檢南齊北齊及梁郊祀亦飲福酒訖燔又檢後周及隋郊祀亦先祭後燔據

此周遵後燔晉不先燔無忌之言事乃相乖又按周禮
大宗伯職以玉作六器以禮天地四方注云禮謂始告
神時薦於神座也下文云以蒼璧禮天以黃琮禮地皆
有牲幣各放其器之色又禮器云有以少為貴者祭天
特牲是知蒼璧之與蒼牲俱合奠之神座理即不惑又
云四圭有邸以祀天旅上帝即明祀昊天上帝之時以
旅五方天帝明矣其青圭赤璋白琥玄璜以立春立夏
立秋立冬日各於其方迎氣所用自分別矣今按顯慶

所改新禮以蒼璧與蒼牲幣俱用先燔蒼璧既已燔矣所以遂加四圭有邸莫之神座蒼牲既燔矣所以更加駢牲充其實俎混昊天於五帝同用四圭失特牲之明大加為二犢深乖禮意事乃無憑考功員外郎趙冬曦太學博士侯行果又曰先焚者本以降神行之已久中書令張說又執奏曰徐堅等所議燔柴前後議有不同據祭意及貞觀顯慶已後即先燔若欲正失禮求祭意請從貞觀禮如且因循不改請從顯慶禮凡祭者本以

心為主心至則通於天地達於神祇既有先燔後燔自可斷於聖意聖意所至則同於神燔之先後臣等不敢裁定帝令依後燔及先奠牲璧之議是後太常卿寧王憲奏請諸郊壇時祭並依此先奠璧而後燔柴瘞埋帝從之時又以四門助教施敬本駁奏舊封禪禮八條其畧曰舊禮侍中跪取匱沃盥非禮也夫盥手洗爵人君將致潔而尊神故小臣為之今侍中大臣也而沃盥於人君太祝小臣也反詔祝於天神是接天神以小臣奉

人君以大臣故非禮按周禮大宗伯曰鬱人下士二人
裸事則沃盥此職也漢承秦制則無鬱人之職故使近
臣為之魏晉至今因而不改然則漢禮侍中行之則可
矣今以侍中為之則非也漢侍中其始也微高帝時籍
儒為之惠帝時閔儒為之留侯子辟彊年十五為之至
後漢樓堅以議郎拜侍中邵闔自侍中遷步兵校尉其
秩千石少府卿之官屬也少府卿秩中二千石丞秩千
石侍中與少府丞班同魏代蘇則為之舊侍中親省起

居故謂之執獸子吉茂見則嘲之曰仕進不止執獸子
是言其為褻臣也今侍中名則古官人非昔任掌同燮
理寄實鹽梅非復漢魏執獸子之班異乎周禮鬱人之
職行舟不息墜劍方遙驗刻而求可謂謬矣夫祝以傳
命通主人之意以薦於神明非賤職也故兩君相見則
卿為上儻況天人之際其肅恭之禮以兩君為喻不亦
大哉今太宰太祝下士也非所以重命而尊神之義也
然則漢太祝是禮矣何者按周禮大宗伯曰太祝下大

夫二人上士四人掌六祝之祠大宗伯為上卿今禮部尚書太常卿比也小宗伯中大夫今侍郎少卿比也太祝下大夫今郎中太常丞比也上士四人今員外郎太常博士比也故可以處天人之際致尊極之祠矣又漢太祝令秩六百石與太常博士同班梁太祝令與南臺御史同班今太祝下士之卑而居古下大夫之職斯又刻舟之論不殊於前矣又曰舊禮謁者引太尉升壇亞獻非禮也謁者已賤升壇已重是徵名用之欲合於古

而不知戾於古而變於今也按漢官儀尚書御史臺官屬有謁者僕射一人秩六百石銅印青綬謁者三十五人以郎中滿歲稱給事未滿歲稱權謁者又按漢百官公卿表光祿勳官屬有郎中員秩比二千石有謁者掌賓贊受事員七十人秩比六百石則古之謁者秩異等今謁者班微以之從事可謂疎矣又曰舊禮尚書令奉玉牒今無其官請以中書令從事又按漢武帝時張安世為尚書令遊宴後宮以宦者一人出入帝命改為中

書謁者令至成帝罷宦者用士人魏黃初改秘書置中書監令舊尚書并掌制誥既置中書官而制誥樞密皆掌焉則自魏以來中書是漢朝尚書之職今尚書令奉玉牒是用漢禮其官既闕故以中書令主之議奏玄宗令張說徐堅召敬本與之對議詳定說等奏曰敬本所議其中四條先已改定有不同者望臨時量事改攝制從之癸亥以東封鹵簿人少召外州音聲人助之隨駕警衛十月己未勅曰自古明皇仁及萬物今助天孳育

方欲告成其緣祭祀及在路供頓犧牲餼牢禮不可闕
除此外天下諸州並令斷屠及漁獵採捕駕迴至京任
依常式辛酉帝發東都巡狩庚午至濮州河南百五里
內父老皆獻牛酒還其牛各賜帛一疋遣之丁丑白鵲
見于行宮

十一月丙戌至泰山之下去山趾五里丁亥帝袞冕服
於行宮致齋戊子勅曰封祀告成為萬姓祈福必資清
潔以副朕心其行事官及齋郎應致齋者宜令御史行

齋切勿容疎怠有雄野雞飛入齋宮馴而不去久之飛入仗衛忽不見邠王守禮等賀曰臣謹按舊典雌來者伯雄來者王又聖誕酉年雞主於酉斯蓋王道遐被天命休禎臣請宣付史官以彰靈貺從之己丑日南至帝備法駕登山旌旗天仗雲屯百餘里環衛於嶽之下列千廬於晷谷文武百僚二王後孔子後諸方朝集使及蕃夷君長咸從是日有詔應行從羣臣並留於谷口帝獨與宰臣及升壇行事之官登於嶽上齋宮之所初帝

以靈山清潔不欲誼繁將令初獻於山上壇行事亞獻於山下壇行事召禮官學士賀知章等入講儀注因問之知章等奏曰昊天上帝君位五方精帝臣位帝號雖同而君臣異位陛下享君位於山上羣臣禮臣位於山下誠足垂範來葉為變禮之大者也然禮成於三初獻亞終合於一處帝曰朕正欲如是故問卿耳於是勅三獻於山上行事其五方帝及諸臣座於山下壇行事帝因問玉牒之文前代帝王何故秘之知章對曰玉牒本

是通於明神之意前代帝王所求各異或禱年筭或思
神仙其事微密是故外人莫知之帝曰朕今此行皆為
蒼生祈福更無私請宜將玉牒出示百僚使知朕意其
詞曰有唐嗣天子臣某敢昭告于昊天上帝天啓李氏
運興土德高祖太宗受命立極高宗升中六合殷盛中
宗紹復繼體不定上帝眷祐錫臣忠武底綏內難推戴
聖父恭承大寶十有三年敬若天意四海晏然封祀岱
宗謝成于天子孫百祿蒼生受福庚寅祀昊天上帝于

山上高祖神堯皇帝配享帝冕裘升壇奉珪璧奠獻以
邠王守禮亞獻寧王憲終獻命有司享五帝百神於山
下壇禮畢帝乃飲福酒中書令張說進稱賜皇帝太一
神策周而復始永綏兆人帝拜稽首山上作圓臺四階
謂之封祀壇臺上有方石再累謂之石礮玉牒玉冊刻
玉填金為字各盛以玉匱緘以金繩封以金泥皇帝以
受命寶印之納玉匱二於礮中金泥礮際以天下同文
之印封之然後焚柴燎祭羣臣稱萬歲傳呼從山頂至

於山下振動天地於是整鑿輅還山下之齋宮有慶雲
隨馬祥風繞輅中書令張說等蹈舞拜賀帝曰朕以薄
德恭膺大寶雲物休祐皆是卿等輔弼之力君臣相保
勉副天心長如今日不敢怠矜說等又奏曰聖心誠懇
昨夜致齋則息風收雨今朝封祀則天清日暖復有祥
風助樂卿雲引燎靈迹盛事自古未聞陛下又思慎終
如初長福萬姓天下幸甚辛卯祀皇地祇於社首之泰
折壇睿宗大聖真皇帝配享藏玉策於石礮如封祀壇

之儀初帝登山至齋宮其夕陰雲慘冽勁風四起裂幕折柱寒氣切骨帝露立祈請仰天自誓曰某身有過請即降罰萬人無福亦請某為當罪應時風止天地清晏日氣和煦及升壇休氣四塞登歌奏樂有祥風自南而至絲竹之聲飄若天外及禪社首五色雲現見日重輪壬辰帝御朝覲壇之帳殿朝羣臣大赦天下詔曰朕躬陟天門宿齋日觀時屬嚴冬雪後初夜風寒朕因露立祈恩誓欲代人當咎俯仰之際頓息霜飈奠獻之晨變

同韶景誠荷上天垂祐亦賴靈山吐祥詩云無德不報
宜封泰山神為天齊王禮秩加三公一等宜令所管崇
飾祠廟去十里禁其樵採給近山二十戶以奉祠神天
下賜酺七月帝製紀泰山銘親書勒於山頂之石壁其
詞曰朕宅位十有四載顧惟不德懵于至道任夫難任
安夫難安茲朕未知獲戾于上下心之浩盪若涉于大
川賴上帝垂休先后儲慶宰衡庶尹交修皇極四海會
同伍典敷暢歲云嘉熟人用大和百辟僉謀唱余封禪

謂孝莫大於嚴父謂禮莫尊於告天天符既至人望既積固請不已固辭不獲肆余與夫二三臣稽虞典繹漢制張皇六師震疊九寓旌旗有列士馬無譁肅肅邕邕翼翼溶溶以至於岱宗順也爾雅曰泰山為東嶽周官曰兗州之鎮山實惟天帝之孫羣靈之府其方處萬物之始故稱岱焉其位居五嶽之伯故稱宗焉自昔王者受命易姓於是乎啓天地薦成功序圖錄紀氏號朕統承先王茲率厥典實欲報玄天之眷命為蒼生而祈福

豈敢高視千古自比九皇哉故設壇場答休命則亦與
百執事尚綏兆人將多于前功而誌彼後患一夫不獲
萬方其罪余一心有終上天其知我朕惟實行三德曰
慈儉謙慈者覆無疆之言儉者崇將來之訓自滿者人
損自謙者天益如是則軌迹易循基構易守磨石壁刻
金字冀後之人聽詞而見心觀末而知本銘曰維天生
民立君以理維君受命奉天為子代去不留人來無已
德涼者滅道高斯起赫赫高祖明明太宗爰革隋政奄

有萬邦罄天張宇盡地開封武稱有截文表時邕高宗
稽古德施周溥茫茫九夷削平一鼓禮備封禪功齊舜
禹巖巖岱宗衍我神主中宗紹運舊邦惟新恭已南面
氤氳化淳告成之禮留諸後人緬予小子重基五聖匪
功伐高匪德矜盛欽若祀典丕承永命至誠動天福我
萬姓古封泰山七十二君或禪亭亭或禪云云其迹不
見其名可聞祇適文祖光昭舊勲方士虛誕儒書不足
秩后求仙巫神檢玉秦災風雨漢污編錄德未合天或

承之辱道在觀政名非從欲銘之絕巖播告羣牧於是
中書令張說撰封祀壇頌侍中源乾曜撰社首壇頌禮
部尚書蘇頲撰朝覲壇頌以紀聖德是日以侍中源乾
曜為尚書左丞相兼侍中中書令張說為尚書右丞相
兼中書令蓋以宰相之任佐于王化勒成岱宗特有寵
也

二十三年九月丁卯文武百官尚書左丞相蕭嵩等累
表請封嵩華二嶽表曰臣聞封巒之運王者告成當休

明而闕典乃臣子之深過伏惟開元神武皇帝陛下受命繼天應期光宅垂慶雲而覆露暢和氣以生成物荷深仁時惟天道文明之化洽矣穆清之風被矣淳源既泳福應咸臻盈於天壤昭於方策盖非愚下所能頌美且天之上日監在茲嘉大聖之神功降元符以表德恭伸昭報祇事升中古昔大猷孰先茲道臣等覩休徵以上請陛下崇謙讓以固辭事恐勞人抑其勤願德音所逮自古未聞昔虞巡四嶽周在一歲書稱其美不以

為煩寧彼華嵩皆列近甸復茲豐稔又倍他年歲熟則
餘糧地近則易給况費務蓋寡咸有司存儲峙無多豈
煩黎庶吏當首路以望屬車陛下往封泰山不秘玉牒
嚴禋上帝本為蒼生今其如何而闕斯禮伏願發揮盛
事差擇元辰先檢玉於嵩山次泥金於華嶽天休既答
人望見從上下交歡生靈幸甚臣等昧死敢此竭誠理
在至公祈於俯遂無任悃欵之至謹詣朝堂陳請以聞
帝固讓不從手詔報曰升中于天帝王盛禮蓋謂臻茲

淳化告厥成功今兆庶雖安尚竭豐年之慶邊疆則靜
猶有踐更之勞况自愧於隆周敢追跡於大舜頃年迫
於萬方之請難違多士之心東封泰山於今惕厲豈可
更議嵩華自貽慙慙雖藉公卿共康庶政永惟菲薄何
以克堪朕意必誠宜斷來表也

二十八年九月己丑邠王守禮率宗子左丞相裴耀卿
率百官僧道父老皆於朝堂抗表以時和年豐請封嵩
華二山帝抑而不許

天寶九載正月文武百寮禮部尚書崔翹等累上表請封西嶽刻石紀榮號帝固拒不許翹等又奉表懇請曰自今月辛亥至於癸丑累表誠祈請紀榮號聖心恭默冲讓再三臣等伏讀綸言退增祇慄敢重滙愚懇期諸必遂臣聞聖人之言與春秋而同信上天之宰將影響而合符昭報不可以久稽成命不可以固拒今靈山警蹕望玉鑿之升中儒林展儀思金匱之盛禮發祥儲祉喻以封山人事天時不可失也伏惟開元天地大寶聖

大神武應道皇帝陛下祖武宗文重熙累洽雷風化而
祇礪在動植而昭蘇外戶不扃餘糧栖畝其神功至道
廣瑞殊祥前表縷陳安敢浮說夫修德以俟命勤功以
告成將欲竭款神祇雍熙帝載未為過越也伏惟覽公
卿之議考封禪之禮陟華蓋於翠微轉鈞陳於雲路泥
金於函苞之上刻玉於明星之前使三五六經復再聞
於唐典七十二姓不獨紀於夷吾數景福以浸黎元錫
大慶而後天地蒼生之望也朝廷之幸也無任誠懇悃

款之至謹詣朝堂奉表陳請以聞帝手詔不許曰輕修大典所不願為時或傳中旨請紀榮號何如空云請封西嶽乙卯羣臣又奉表請封西嶽曰臣翹等伏稽古訓上請增封再奉明旨未蒙允諾臣等承詔惶駭失圖臣聞省方展義君人之大典登封告成王者之丕業是以古先哲后道洽則封所以答神祇之功增兆庶之福無私於已故行之者不思必順於天故言之者難奪敢昧萬責竭誠終請伏惟開元天地大寶聖文神武應道皇

帝陛下紹文武之丕烈合君臣於昌運均雨露和陰陽
西海無波而靜默羣生自樂而仁壽繇是德懷蠻貊澤
洎昆蟲宗廟祀典罔不祗肅要荒殊俗亦莫不庭自皇
王已來載籍所記未有混區宇窮禎祥地平天成德茂
道洽若今日之盛者與固可告太平之功展封崇之禮
故臣與王公侯伯黎老縉黃累陳白奏備竭丹懇豈謂
聖恩猶阻皇鑒未迴伏奉癸丑詔書曰輕修大典所不
願為臣等戰慄匪遑寧處實以陛下功成道洽理實升

中且夫龜龍咸格天意也夷夏大同人事也時和年豐
太平也無為清淨至理也允應大典豈謂輕修乎奉若
靈命安可不為乎臣等敢冒宸極重明其義竊以西嶽
華山實鎮京國皇虞之所循省靈仙之所依憑固可封
也况金方正位合陛下本命之符白帝臨壇告陛下長
生之籙發祥作聖抑有明徵又可封也昔周成王以翦
桐為戲唐叔因是而定封蓋人君之言動有成憲斯事
至細猶不忽也况陛下眷言封祀宿著神明道已洽於

升平事未符於琬琰豈可抑至公於私讓棄誠信於神明乎固不可得而辭也日者封章累奉嘉應必臻一獻而甘雨流再陳而瑞雪降則知人天之意影響合符若然者陛下安得稽天命以固辭違人事以久讓太平不告其若休祥何至理不答其若神祇何伏願仰答天心允祇靈贖上以揚祖宗之盛烈下以副億兆之懇誠克崇上報永光大典臣等幸甚宗子又上表曰臣徹等伏見禎祥委積河海澄清長瞻北極之尊屢獻西封之疏

誠懇不達天鑒未從徘徊闕庭隕越無地陛下再造區
寓肇康生人與天合符與道合契故得靈芝表瑞玉版
呈文九穀歲衍於京坻百蠻盡習其冠帶能事備於典
策盛德光於祖宗升中告成是屬今日惟夫太華高冠
羣山當其少陰鎮此西土自有虞巡狩歷祀三千夏殷
以還罕能肆覲陛下雖加進寵號增崇廟宇而大禮未
施精意空潔又陛下頃歲建碑曰嘗勤報德之願未暇
封崇之禮萬姓瞻予言可復也臣以為天地之主豈徒

言哉神祇候望故已久矣伏願俯順百辟兆人之請明
徵刻石銘山之記暨遷萬乘降被三峯奠珪璧於中壇
奏笙鏞於上帝使普天蒙福重賜無疆頻冒宸嚴並期
必遂無任懇切屏營之至謹詣朝堂奉表陳請以聞凡
三上表上乃許之丁巳詔曰以今載十一月有事華山
中書門下及禮官詳儀注奏聞務從省便是載三月西
嶽祠廟災時關中久旱詔曰自春以來頗愆時雨登封
告禪情所未遑所封西嶽宜停

冊府元龜卷三十六

欽定四庫全書

冊府元龜卷三十七

宋 王欽若等 撰

帝王部

頌德

詩有六義其一曰頌所以議盛德之形容以其成功告於神明者也若乃駿命允集聖政光被武功震耀遠夷率服孝德昭著風俗歸厚乃至典禮修舉珍符沓委王澤漸漬時文載郁繇是羣臣歸美頌聲並作或端委穆

清壽觴斯薦或奏御公車英詞煥發擣華奮藻引商流
羽是光帝德以播國風粲然可觀於斯為盛至有述上
世之懿烈揚無窮之休問固足以播之莞籥昭示來裔
皆所以揄揚褒贊極臣子竭忠稱君之分也

舜作歌曰勅天之命惟時惟幾

因庶尹允諧之政故作歌以戒安不怠危勅正

也奉正天命以臨民惟在順時惟在慎微

乃歌曰股肱喜哉元首起哉百工

熙哉

元首君也股肱之臣嘉樂盡志君之治功乃起百官之事業乃廣

臯陶拜手稽首

颺言曰念哉

大言曰颺承歌以戒帝

率作興事慎乃憲欽哉

憲法也天

子率臣下為起治之事
當慎汝法度敬其職

屢省乃成欽哉

屢數也當數願
省汝成功敬終

以善無
懈怠

乃賡載歌曰元首明哉股肱良哉庶事康哉

賡續

載成也帝歌歸美股肱義未足故續
歌先君後臣衆事乃安以成其義

成湯放桀于南巢惟有慙德

湯放桀武功成故以為號
南巢地名有慙德慙德不

及古曰子恐來世以台為口實

恐來世論道我放
天子嘗不去口

仲虺曰

惟王不邇聲色不殖貨利

邇近也不近聲樂言清簡不
近女色言貞固殖生也不生

資貨財利言不貪也
既有聖德兼有此行

德懋懋官功懋懋賞用人惟已改

過不吝

勉於德者則勉之以官勉於功者則勉之以賞
用人之言若自己出有過即改無所吝惜所以

能成王業

克寬克仁彰信兆民

言湯寬仁之德明信于天下

乃葛伯仇餉

初征自葛東征西夷怨南征北狄怨

葛伯進行見農民之餉于田者殺其

人奪其餉故謂之仇餉仇怨也湯為是以不祀之罪伐之從此遂征無道西夷北狄舉遠以言則近者著矣

曰奚獨後予

怨者辭也

攸徂之民室家相慶曰俟予后后來

其蘇

湯所往之民皆喜曰待我后來其可蘇息

民之戴商厥惟舊哉

史謂初征自葛

始佑賢輔德顯忠遂良

賢則助之德則輔之忠則顯之良則進之明王之道兼弱

攻昧取亂侮亡

弱則兼之闇則攻之亂則取之有亡形則侮之言正義

推亡固存

邦乃其昌

有亡道則推而亡之有存道則輔而固之王者如此國乃昌盛

德日新萬邦

惟懷志自滿九族乃離

日新不懈怠自滿志益溢

王懋昭大德建中

于民以義制事以禮制心垂裕後昆

欲王自勉明大德建大中之道于民

率義奉禮垂優足之道于後世

予聞曰能自得師者王

求賢聖而事之謂人莫

已若者亡

自多足人莫之益亡之道

好問則裕自用則小

問則有得所以足不

問專固所以小

嗚呼慎厥終惟其始

靡不有初鮮克有終故戒慎終如其始

殖有

禮覆昏暴

有禮者封殖之昏暴者覆亡之

欽崇天道永保天命

王者如此行事

則敬天安命之道

周公居攝五年之末以文王受命不卒而終時天下太

平故承其意而告之作維天之命之詩成王時唐叔得

禾異畝同穎獻諸天子王命唐叔歸周公于東作歸禾

周公既得命禾旅天子之命

已得唐叔之禾遂陳成王歸禾之命而推美成王善

則稱

作嘉禾

天下和同政之善者故周公作書以嘉禾名篇告天下

宣王時仍叔為大夫作雲漢之詩以美宣王宣王承厲王之烈內有撥亂之志遇戕而懼側身脩行欲銷去之天下喜於王化復行百姓見憂故作是詩

尹吉甫為王卿士作崧高美宣王也天下復平能建國

親諸侯褒賞申伯焉

尹官氏申國名申伯宣王舅也以賢人為王之卿士佐王有功王以

正禮遣申伯之國有車馬之賜餼于郟也

又作烝民美宣王任賢使能周室

中興焉

賢能謂樊侯仲山甫也其詩曰王命仲山甫式是百辟纘戎祖考王躬是保

又作韓

奕美宣王能錫命諸侯

梁山于韓國之山最高大為國之鎮所望祀焉故美大其貌奕

然謂之韓奕也梁山今在馮翊夏陽西北韓姬姓之國也後為晉所滅故大夫韓氏以為邑名焉其詩曰王錫韓侯其追其貺奄受北國因以其伯又作江漢美宣王能興衰撥亂命召

公平淮夷也

召穆公虎也淮夷東國在淮浦而夷行召公受命伐而服之

召穆公為王卿士作常武之詩美宣王有常德以立武

事因以為戒

漢武東封泰山還登明堂御史大夫倪寬上壽曰臣聞

三代改制屬象相因

政教之法象相因屬屬連也

間者聖統廢絕

聖統

聖人之道業謂禮文也

陛下發憤合指天地祖立明堂辟雍

祖始也

宗祀泰一

宗尊也

六律五聲

六律謂黃鐘大簇姑洗蕤賓夷則無射也五聲宮商角徵

羽也幽贊聖意

幽深也贊明也

神樂四合各有方象

四方色及五神祭祀聲樂

各有等

以承嘉祀為萬世則

則法也

天下幸甚將建太元本

瑞登告岱宗發祉闔門以候景至癸亥宗祀日宣重光

上元甲子肅邕永享

太平之世日抱重光謂日有重日也將者南始之辭也太元太初歷

也本瑞謂白麟寶鼎之屬也以候景冬至之景也上元甲子太初元年甲子朔旦冬至也宗尊也肅敬也邕和

也既敬且和則長為天所享也

光輝充塞天文粲然

塞滿也燦然明貌

見象曰

昭報降符應

言天顯示景象日月昭明也降下符應以報德化

臣寬奉觴再拜

上千萬歲壽制曰敬舉君之觴

終軍為給事中從武帝幸雍祠五時獲白麟一角而五

蹄

每一足有五蹄也

時又得奇木其枝傍出輒復合於本上帝

異此二物博謀羣臣

訪其微應也

軍對曰臣聞詩頌君德樂

舞后功異經而同指明盛德之所隆也南越竄屏葭葦

與鳥魚羣

葭葦也成長則曰葦

正朔不及其俗有司臨境而東甌

內附閩王伏辜南越賴救北胡隨畜薦居

薦屨也隨畜牧屨易故居

不安住也左傳戎狄薦居

禽獸行虎狼心上古未能攝大將軍秉鉞

單于犇幕驃騎抗旌昆邪右衽

抗舉也右衽從中國化也

是澤南洽

而威北暢也

洽溥也暢達也

若罰不阿近舉不遺遠設官俟賢

縣賞待功能者進以保祿罷者退而勞力

謂不堪職任者也勞力歸

農畝也

刑於宇內矣

刑法也言威法於宇內也一曰刑見也

履衆美而不足

懷聖明而不專

言自謀也

建三宮之文質章厥職之所宜

三宮

明堂辟雍靈臺也言於三宮班政教有文質也

封禪之君無聞焉

前世封禪之君不聞若斯

之美也

夫天命初定萬事草創

謂創始受命之君也

及臻六合同風

九州共貫必待明聖潤色祖業傳於無窮

潤色謂光飾也

故周

至成王然後制定休徵之應見

休美也徵証也

陛下盛日月之

光垂聖思於勒成專神明之敬奉燔瘞於郊宮

燔祭天也瘞祭

地也祭天則燒之祭地則蕘之郊宮謂秦時及后土也

獻享之精交神積和之氣

塞明

塞合也明者明靈亦謂神也

而異獸來獲宜矣昔武王中流未

濟白魚入舟俯取以燎羣公咸曰休哉謂伐紂時今郊祀未

見於神祇而獲獸以饋以饋謂充祭俎也此天之所以示饗而

上通之符合也宜因昭時令日改定告元改元年以告神祇也昭明

也令善也苴白茅於江淮發嘉號於營丘以應緝熙苴作席也江淮

職貢三脊茅為藉也非苞苴之苴也嘉號封禪也太山在齊分野故曰營丘也或曰登封太山以明姓號使

著事者有紀焉謂史官紀記也蓋六鵝退飛逆也六鵝退飛象諸侯畔逆宋

襄公伯道退也白魚登舟順也謂武王伐紂而魚入王舟象征而必獲故曰順也夫明

闇之徵上亂飛鳥下動淵魚亂變也各以類推今野獸并

角明同本也

并合也獸皆兩角今此獨一故云并也

衆枝內附示無外也

若此之應殆將有解編髮削左衽襲冠帶要衣裳而蒙

化者焉

要衣裳謂著中國之衣裳也

斯拱而竢之耳對奏上甚異之

由是改元為元狩後數月越地及匈奴名王有率衆來降者時皆以軍言為中

吾丘壽王為光祿大夫汾陰得寶鼎武帝嘉之薦宗廟藏於甘泉宮羣臣皆上壽賀曰陛下得周鼎壽王獨曰非周鼎帝聞之召而問之曰今朕得周鼎羣臣皆以為

然壽王獨以為非何也有說則可無說則死壽王對曰

臣安敢無說臣聞周德始乎后稷長於公劉大於太王

公劉后稷曾孫也太王文王之祖則古公亶父也成於文武顯於周公德澤上

昭天下涌泉

昭明也涌言潤澤下沾如屋之涌

無所不通上天報應鼎

為周出故名曰周鼎今漢自高祖繼周亦昭顯德行施

恩布惠六合和同至於陛下恢廓祖業功德愈盛天瑞

並至禎祥畢見昔秦始皇親出鼎於彭城而不能得天

祚有德而寶鼎自出此天之所以與漢迺漢寶非周寶

也上曰善羣臣皆稱萬歲賜壽王金十斤

宣帝時天下和平四夷賓服神爵五鳳之間屢蒙瑞應而益州刺史王襄欲宣風化於衆庶聞王褒有俊才請

與相見使褒作中和樂職宣布詩

中和者言政治和平也樂職者言百官各

得其職也宣布者風化所洽無所不被

選好事者令依鹿鳴之聲習而歌

之時汜鄉侯何武為童子選在歌中久之武等學長安

歌太學下轉而上聞宣帝召見武等觀之皆賜帛謂曰

此盛德之事吾何足以當之褒既為刺史作頌

即上中和樂職

宣布詩也以美
盛德故謂之頌

又作其傳

解釋頌歌之義
及作者之意

益州刺史因

奏褒有軼材迺徵褒既至詔為聖主得賢臣頌

後漢明帝永平十七年公卿百官以帝威德懷遠神物
顯應乃並集朝堂奉觴上壽制曰天生神物以應王者
遠人慕化實繇有德朕以虛薄何以享斯唯高祖光武
聖德所被不敢有辭其敬舉觴太常擇吉日策告宗廟
章帝建初三年正月己酉宗祀明堂時郎中傅毅追美
孝明皇帝功德最盛而廟頌未立乃依清廟作顯宗頌

十篇奏之元和中始脩古禮巡狩方岳崔駟上四巡頌
以稱漢德辭甚典美時丁鴻以少府從上奏曰臣聞古
之帝王統治天下五載巡狩至于岱宗柴祭於天望秩
山川協時月正日角斗斛權衡使人不爭陛下尊履蒸
蒸奉承弘業祀五帝於明堂配以光武二祖四宗咸有
告祀瞻望泰山嘉澤降澍柴祭之日白雲上升與燎煙
合黃鵠羣翔所謂神人以和答饗之休符也帝善焉

魏太祖以孫權稱臣遺詔大理王朗朗答曰孫權前牋

自詭躬討虜以補前愆後疏稱臣以明無二牙獸屈膝
言烏告歡明珠南金遠珍必至情見乎辭効著乎功三
江五湖為沼于魏西吳東越化為國民鄢郢既拔荆門
自開席卷巴蜀形勢已成重休累慶雜沓相隨承旨之
日撫掌擊節情之畜者辭不能宣

晉武帝時摯虞為聞喜令時天子留心正道又吳寇新
平天下又安虞上太康頌以美晉德潘岳辟太尉府舉
文章秀才武帝躬耕藉田岳作賦以美其事

元帝初王廙為琅琊王司馬王敦啟為荊州刺史及帝
即位廙奏中興賦上疏曰臣託備肺腑幼蒙洪潤受自
齟齬至於弱冠陛下之所撫育恩侔於兄弟義同於交
友思欲攀龍鱗附鳳翼者有年矣是以昔忝濮陽棄官
遠跡扶持老母攜將細弱越長江歸陛下者誠以道之
所存願託餘蔭故也天誘其願遇陛下中興當大明之
盛而守局遐外不得奉瞻大禮聞問之日悲喜交集昔
司馬相如不得觀封禪之事慷慨發憤况臣情則骨肉

服膺聖化哉又臣昔嘗侍坐於先后說陛下誕育之日
光明映室白毫生於額之左相者謂王當有四海又臣
以壬申歲見用為鄱陽內史七月四星聚於牽牛又臣
郡有枯樟更生及臣後還京都陛下見白兔命臣作賦
時琅瑯又獻甘露陛下命臣嘗之又驃騎將軍道向臣
說晉陵有金鐸之瑞郭璞云必致中興璞之文筮雖京
房管輅不過也明天之厯數在陛下矣臣少好文學志
在史籍而飄放遐外嘗與桀寇為對臣犬馬之年四十

三矣未能上報天地而誓負屢彰恐先朝露填溝壑今
微情不得上達謹竭其頑獻中興賦一篇雖未足以宣
揚盛美亦是詩人嗟歎詠歌之義也

成帝咸康八年九月廬江春穀縣留珪夜見門內有光
取得玉鼎一枚圍四寸豫州刺史路永以縣著作郎曹
毗上玉鼎頌

孝武帝時袁宏為東陽太守以漢時傅毅作顯宗頌辭
甚典雅乃作頌九章頌簡文之德上於帝

後魏道武既破賀訥遂命羣臣登勿居山遊宴終日從官及諸部大人請聚石為峯以紀功德命張襄為文獻文時高允為中書令從帝北伐大捷而還至武川鎮上北伐頌帝覽而善之

高閭為昭武將軍時獻文傳位從御崇光宮閭上表頌孝文時閭為中書監太和三年冬至帝及文明太后大饗羣官帝親舞於太后前羣臣皆舞帝乃歌仍率羣臣再拜上壽閭進曰臣聞大夫行孝義合一家諸侯行孝

聲著一國天子行孝德被四海今陛下聖性自天敦行
孝道稱願上壽靈應無差臣等不勝慶踊謹上千萬歲
壽帝大悅賜羣臣帛人三十疋

宣武永平中甄楷上孝文頌十三篇優詔報之

高聰為散騎常侍黃門侍郎宣武幸鄴還於河內懷界
帝親射矢一里五十餘步侍中高顯等奏伏見親御弧
矢臨高設弋鳴弦動羽馳鏃所逮三百五十餘步臣等
伏惟陛下聖武自天神藝夙茂巧會騶虞之節妙盡矍

圃之義威稜攸疊黼光攝氣才猛所振勅懃彌心足以
肅截九區赫服八字矣盛事奇迹必宜表述請勒銘射
宮永彰聖意詔曰此乃弓弧小藝何足以示後葉喉唇
近侍苟以為然亦豈容有異便可如請遂勒銘於射所
聰為之詞

隋高祖時突厥葉護可汗以帝所賜旗鼓西征嬰婆遂
生擒嬰婆既而上書請嬰婆既生之命上下其議左僕
射高潁進曰骨肉相殘教之蠹也存養以示寬大帝曰

善頰因奉觴進曰自軒轅以來獯鬻多為邊患今遠窮北海皆為臣妾此之盛事振古未聞臣敢再拜上壽

唐高祖武德八年四月赤雀巢於殿門宴五品已上上頌者十餘人極歡而罷

七月高祖從容謂侍中陳叔達曰自古帝王統一四海者凡有幾人對曰五帝三王已前年代浸遠近古已來有秦始皇之與兩漢下洎晉武耳高祖曰朕幸得繼前哲於朕良多叔達又對曰隋末亂離蒼生塗地若不逢

陛下救其淪溺黎庶殆為魚矣此蓋天授非人力所致
帝大悅

九年四月給事中歐陽詢奏上帝德論帝覽之稱善

太宗貞觀三年正月親祭先農躬御耒耜藉于千畝之
甸初晉氏南遷後魏來自雲朔中原分裂又雜以獯戎
代歷周隋此禮久廢而今始行之觀者莫不躍駭於是
秘書郎岑文本獻藉田頌以美之

臣欽若等曰按後魏
後周並耕藉田與此

所載
有異

六年閏八月秘書少監虞世南上聖德論帝手詔答曰
卿所論太美但朕德甚寡恐有識者窺卿為後人所笑
卿引古昔無為而治朕未敢擬倫比之近代乍踰之耳
卿覩朕之始未見朕之終宜付秘書若朕能慎終如初
則可為也如違此道不用後代笑卿焉

十四年二月陝州言河水變清司空長孫無忌等詣闕
上表曰臣聞崑崙戴極道玄液以周天積石疏源委滄
波而括地俯作神州之紀仰膺上帝之宮水德靈長斯

其謂矣故能道符千載位長百川瑞馬開圖發榮光於
遠代應龍闢壤致宅土於遐年自此不追寂寥難俟天
之祚聖復在於茲伏惟皇帝陛下則哲承基窮神闡化
功綿寓外德耀瀛表文教蔚乎三五至道格乎天地是
以禎凝藪澤慶溢風煙丹井輝奇青丘表異嘉苗合穎
入豐膳以鳴鐘天駟瀾雲播頌聲於綴兆西鵠南雉之
晝日至月書連珠湧醴之徵雲霏霧集宜其展事羸里
仰告成功出豫介丘方騰茂實猶且宵衣旰食若有追

而不逮對越嘉祉乃固辭而弗居遂使萬玉韜華三神
缺望西星佇炤申以德水之祥東岳希封勗以清河之
貺陝州刺史房仁裕狀稱所界內二百餘里正月元日
黃河載清謹按易乾鑿度曰聖人受命河水清京房飛
候曰河水清天下太平繇是納渭合涇混流同潔凌門
幼澤別派俱清馬頰馳波詳觀若鏡龍門激箭迴眺飛
空滔天之曲煥然冰夷之都可見千尋朗澈俯映玄珠
一曲澄鮮遙觀紫貝盡河宗之奧秘洞水府之仙靈豈

非天鑒詳明不愛其道神心昭著在感斯通何幽顯合
符人祇交際理均形契若斯之效歟臣等沐道醉心觀
祥駭目按圖逖聽曠古無聞實慶生涯親承旦暮詔答
曰嘉瑞爰降必資至德大河効祉是為希世願惟寡昧
但增慙惕乃天地表祥宗社垂祐欲使四海隆平八荒
禔福王公卿士內外庶僚宜勉脩正道以副靈貺焉是
月帝幸國學觀釋奠命祭酒孔穎達講孝經既畢穎達
上釋奠頌帝手詔褒美

十五年十月太宗問特進魏徵曰朕為人主仰止前烈
至于積德累仁豐功厚利此四者帝王以為稱首朕皆
庶幾自勉人苦不能自見不知於朕之身何等為優徵
曰德仁功利陛下兼而有之然則內平禍亂外除戎狄
是陛下之功安堵黎元各有生業是陛下之利繇此言
之功利居多

十六年七月太宗謂侍臣曰朕數召公等欲問懋闕庶
幾善道以救不逮耳今嘗達夜不寢思為政術非惟憂

勤萬姓亦欲貽法後昆司空長孫無忌奏稱古來撥亂
人主載籍斯存天造草昧之辰爰始經綸之日何嘗不
思聞帝道祇奉王度及即位之後漸染驕盈詩云鮮克
有終此非空說陛下君臨四海將二十載視事之後每
留羣臣陛下為解威嚴貸以顏色唯欲其論國家善惡
用康政化哀愍黎元聖情專切豈臣等獨蒙恩澤四海
蒼生誰不幸甚

二十一年二月詔皇太子之國學釋奠賜學官胄子弟

各有差仍擢其高業右庶子許敬宗上四言詩以美其事

二十二年四月磧外蕃人爭牧馬土界帝親臨斷決然後咸服黃門侍郎褚遂良進曰昔虞芮爭田去此三百里陛下聖德廣運無遠不臻磧外諸夷來斷境域振古以來所未聞也

玄宗開元二年六月左拾遺蔡亨獻龍池集王公卿士以上凡百三十篇請付太常寺其詞合音律者為龍池

樂章以歌聖德從之初帝在藩與宋王等居于興慶里時人謂為五王子宅及景龍末宅內神池涌出汎灑清瑩流之不竭中有龜龍遊焉故羣臣歌之

八年城門即獨孤晏奏曰伏見聖上於別殿安置太宗高宗睿宗聖容每日侵早具服朝謁昔者周公宗祀文王於明堂以配上帝蓋有國之常祀聖上朝夕肅恭是過周公遠矣又聞禁中寧王憲申王撫內朝宴會聖上宮中自拜跪如家人之禮岐王範薛王業恩錫特殊友愛邕睦海內

稱之昔堯九族既睦平章百姓是過帝堯遠矣聖上近
造一小院東西南北各三十餘步寢殿卑狹階高尺三
寸房廊階不過四五寸無青墀所坐氍褥非破不易是
過於夏禹遠矣聖上嘗得絹四十餘萬疋謂侍臣等曰
此物擬充男女嫁娶左藏庫物是百官諸邊將士物豈
得漫用節約且過漢文遠矣聖上至德光厚躬勞庶政
憂人飢寒昔齊君雨雪御裘憂勞凍餒但恤寒耳今聖
上憂冬寒夏熱是過之遠矣請宣付史官從之

十三年十一月封東嶽禮畢於是中書令張說撰封祀
壇頌侍中源乾曜撰社首壇頌禮部尚書蘇頲撰朝覲
壇頌以紀聖德

十九年八月幽州執叛奚壽斤來獻宰臣裴光庭等奏
曰伏以深仁燭幽遠被無外至德感物矧茲有苗頃者
奚壽斤放命不恭執訊來獻而陛下設誠不疑推致赤
心歸于阨落襁負而至置之左右射御不違自非睿聖
至誠被物何以驟改驕節卒為忠臣變鳴梟於鸞鳳登

反側於仁壽求諸前古竹帛所不載稽諸近事耳目所未聞臣等豫覩休異輒敢書于史冊帝曰奚壽斤往因脅從遂同逆命俘虜而至罪則難容收其悔過之心免其殊死之責推誠待物果獲忠臣此皆卿等輔翊之所致豈朕薄德之能感書之簡冊以示將來當斯美名良用慙惕

二十三年二月己亥以奚契丹既平宰臣裴耀卿張九齡李林甫等奏賀曰奚及契丹尤近邊鄙侵軼是慮式

遇成勞臣庶常情欲其防禦所謂長策無出此者陛下
獨斷宸襟高奪羣議以為頓兵塞下轉粟邊軍曠日持
久役無寧歲不若因利乘便一舉遂平使遷善者自新
為惡者就戮其勞不久永息我人且命大兵臨之凶徒
必潰不出此歲當並成擒臣等初奉聖謀高深未測及
聞凱捷晷候不差遠蕃遺類莫不稽顙緣邊戍卒咸返
耕稼卧鼓熄烽誠自此始斯皆陛下睿謀先定神筭非
常觀變早於未萌必取豫於無象臣伏以成功不宰君

人所以為重有美不宣臣子所以成罪臣雖蒙瞽安敢
無言既豫聞始謀又幸見成事豈可使天功虛往日用
不知竹帛相傳復紀何事請宣付史館垂示將來仍許
將吏等刊石立頌以紀功德帝手詔報曰事有難易因
圖可卜小蕃背誕惡貫已盈人神棄之指期可滅今之
尅定偶會夙心記以史官銘之樂石頗矜功伐不願為
之卿等苦論載用多愧使桓山之頌復在茲乎

八月癸巳千秋節命諸學士及僧道講論三教同異中

書令張九齡上言曰臣聞好尚之論事蹟於偏方至極之宗理歸於一貫非夫上聖孰採要旨伏惟陛下道契無為思談玄妙考六經之同異筌二教之幽蹟將以降炤羣疑敷化率土屏浮詞於玉殿緝精義於金門一變儒風再揚道要凡百士庶罔不知歸臣等幸侍軒墀親承至訓抃躍之極實倍常情望宣付史館帝手詔報曰畧舉三教求之精義會三歸一初分漸頓理皆共貫使自求之卿等論議廟堂化源何遠事關風教任付史官

天寶元載五月濮陽郡王瓌及嗣王宗子等奏曰臣等
伏以龍池肇慶寶祚攸章聖德動天貞符薦至臣等情
深家國志願光揚去開元二十二年於東京朝堂上表
請建龍池聖德頌曲蒙天睠俯遂微誠其時脩營已就
刻勒所為頌文未備叙事多遺述聖談天萬不舉一既
乖士庶之望莫展宗臣之心尋請改脩冀昭聖德斐然
雖竭於愚思翰墨未絕於琬琰今屬靈符降祉景命維
新天寶之號再加郊廟之儀式展誠合書其實錄光闡

徽猷綴集前文以存不朽特望天恩更許編錄則聖德
鴻業紀而無遺聖美形容於茲允備無任勤懇之至謹
奉表陳請以聞帝手詔報曰夫頌者美盛德之形容每
省朕躬曷稱奇紀歲月斯積符瑞屢臻欲備叙之復茲
誠請實賴人事不遺神明允來意也

八月突厥阿布惠與其黨屬來降中書門下奏曰臣等
伏以匈奴患邊其來日久頃雖朝廷示信約為父子之
國然而好殺喜兵常懷輕掠之志陛下聖謀廣運膺略

玄通至道昭感神明叶贊不勞一卒不煩一兵使其種
落自相攜貳今葉護敗亡殞身漠北妻子縲繫為俘關
下巢傾席卷瓦解雲散萬里無事三邊遂空曠古不賓
盡為臣僕普天所履皆入封疆諒繇負德背恩自速夭
亡之禍固亦休兵偃革用彰海晏之期實有無方之神
寧惟不戰之勝求諸載籍所未嘗聞臣等幸遇昌期欣
逢大慶望宣付史官從之

十二月西河大破吐蕃中書門下表賀曰臣等自今月

以來累見隴右奏大破吐蕃大嶺青海等軍捷書前至日因奏事陛下謂臣等曰吐蕃背恩神人共棄豈惟隴右頻勝三數日間河西當有大捷今日王倭果奏大破吐蕃魚海及遊奕等軍擒生斬級并虜獲羊馬不可勝計竊觀前後克捷皆是特稟聖謀密練驍雄深討兇寇以寡擊衆所向無前天心與睿德合符士卒與神兵叶契九重制勝動必有成萬里知來見於未兆一月三捷千古未聞品物同歡何況臣等伏望宣示朝野編于史

冊詔曰坐運奇謀誠難與戰河西捷書相繼謂之伐叛
可豫圖之所請者依

九載靈州都督兼御史中丞張齊丘上言請於新築北
大都護府建聖德碑頌許之

十載九月中書門下奏曰臣等今日因奏事承德音聞
江南為橘江北為枳蓋以地氣有殊物性因變朕近宮
內種柑子樹數株今秋以來結實一百五顆乃與江南
及蜀道所進無別亦可謂稍異者伏以自天所育者不

能改有常之性曠古所無者乃可為非常之感是知聖人御物以元氣布和大道乘時則殊方叶致且橘柚所植南北異名實造化之有功匪陰陽之所革陛下玄風真紀六合一家雨露所均混天區而齊被草木有性憑地氣而潛通故茲江外之珍果為禁中之花實綠蒂含霜芳流綺殿金衣爛日色麗彤庭豈比夫搖木移根俟風而實若榴傳種因石為名理匪自於人謀事寔關於神化圖牒未有耳目攸新臣等忝侍軒墀恭聞殊應喜

慶交集倍萬常情仍望宣示朝廷光諸史冊帝手詔報
曰枳橘之性惟任土不遷陰陽之和實在能感致且寒
谷吹律猶氣變燕郊則中樞化源故物脩京邑今黃柑
數株丹實盈條裛露迎風香逾江劍金光珠澤秀溢林
庭豈斯果之足珍喜元和之必應故合天道信何遠焉
所賀已知仍依來請

十二月庚申勅安國寺以所撰先皇聖德頌刻石

其石背上

宜題親王嗣郡王及中書門下兩品五品以上供奉官
御史中丞左右丞侍郎諸司文武官員三品以上無節

度使及蕃酋大首領等
名品准諸頌碑制名記

肅宗至德二載十二月玄宗自蜀至帝奉迎於望賢宮
左相苗晉卿中書侍郎同平章事崔圓表言伏見工部
侍郎李遵及殿中監李輔國言皇帝於望賢宮奉迎上
皇望樓趨馳捧足嗚咽問安既退侍膳皆親及出宮之
時親選龍媒侍從歸闕孝敬之至傍感人神四海歸心
恩深錫類羣臣何幸得覩盛美陛下武功冠於千古孝
德踰於百王昔夏之有窮少康復其業漢之新莽光武

繼其緒雖復崇名茂績輝映當時而皆曠日持久動十
數載致使宗社郡邑盪復無遺未有如陛下神武奮發
睿謀獨斷曾不再稔掃清羣兇奉迎聖皇不失舊物蒸
蒸翼翼榮輝區宇考之傳記振古未聞天地人神孰不
慶幸臣請編諸史冊傳之不朽詔曰荷社稷之靈賴上
皇之感翦除寇盜克復京都浹辰之間大勲允集掃清
宮闕奉迎鑾輿昨自望賢宮得申拜慶重歡侍省深戴
君父之恩承順尊嚴固宜臣子之禮卿等訏謨致理翼

贊成功方告史臣有慙薄德乙卯殿中監李輔國奉表
上曰臣聞古今大寶皇王受命成功創業皆始艱難繇
是足高光武之功漢圖斯永滅澆殄之患夏嗣以興豈
比孝以感通德以成化光膺聖歷協契天時開闢已來
未有如陛下者也頃巨猾開釁中夏不康陛下赫然發
憤奉命專征曾不踰旬兩京尅復掃清宮闕奉迎鑿與
警蹕鳴笳舊儀逾盛行軍便幕故事無闕陛下整法駕
擁羣臣遠自望賢拜迎路次引旌旆而祥風不散拂鑿

與而瑞雪時飄承順天顏無違就養君父之禮億兆同
歡猶乃不自為功至崇謙德過周文侍膳之典邁漢高
獻壽之儀虔奉至尊敬恭受命伏惟陛下以孝理天下
也如彼以德化天下也又如此盛德大業其至矣哉臣
幸叅締構職在禁戎得覩盛明無任抃躍伏請編諸史
冊以示將來詔曰朕恭承明命親總兵戎掃撓搶之妖
拯生靈之患宗社所祐何往不尅雖兆自於艱難而終
盛於丕業昨日星順動鑿輿迴京仰戴君父之恩重歡

侍省之慶拜迎之日得展孝誠特荷恩慈多慙薄德遂得祥風引旆瑞雪灑途宮闕生光感應昭著卿為朕心膂夙夜忠勤所請宣付史館宜依

代宗大曆三年夏四月戊申乾陵上仙觀天尊殿有雙鵲銜柴及泥補葺殿之隙壞凡一十五處宰臣等上表賀曰臣聞孝至於天則祥發陵邑德被於物則化及鳥獸伏惟陛下因心廣教弘道極和時因霜露之恩流行雲雨之澤故前聖垂裕歆於明誠皇天報貺賜以嘉應

異鵲來感翔集可窺跡比人謀事歸神化伏望宣示中外編諸史冊帝手詔答曰聖祖仙都高宗園寢希夷清淨之所肅穆哀敬之地二鵲翔集以月繫時常銜堅茨用補缺壞顧政禮之多闕而先靈之幽助祇奉貺祐感切良深卿等道備梓材任當構厦覩茲符應庶洽康寧寔賴嘉謨弼予不逮所請編諸史冊者依

七年十月帝畋于禁苑一發連二兔遣使出示宰臣仍賜之宰臣等拜舞稱慶抗表請付史官以紀鴻猷手詔

不許癸丑宰臣等又上言曰聞王者有日官動而必書
事無虛美用成善終之義觀乎召舉之明體合忠直輔
宣法教斯良史之任也帝者盛美紀于一時闕登雅頌
彰示家國斯君子之罪也昔漢武有獲蛟之歌魏祖有
南皮之事皆盛其殊能叙列前載玄宗開元中蒐於岐
陽親御弧矢陳九軍之禮有百中之捷煥耀圖史布昭
詠歌今陛下以豐歲皆秋農郊始隙因依時令習用戎
事遊涉靈囿經于上蘭以一發之神連三窟之狡弦匪

再控騎無角遂進異前禽之失舉明不合之圍事過舊
聞妙歸天縱足以重威四夷高視千古恩賜之後榮慶
中朝公卿庶尹動色相賀垂於簡牘允叶禮經若聖情
沖深過於謙讓則史臣曠職後代無稱凡在庶位固知
所出伏愿特迴聖慈俯遂誠情手詔答曰帝王之制禮
有三驅弧矢之威財成理道朕方欲清靜流化無為軌
俗射御之藝闕而不書卿等爰據禮經博求良典舉聖
祖岐陽之狩徵漢皇郊廟之歌再陳表章頻志簡冊式

遵彝訓宜依所請

敬宗寶曆元年九月成德軍節度使王廷湊上言請於
管內立皇帝聖德碑二年四月丙寅內出皇帝聖德碑
本以賜廷湊

武宗會昌中幽州節度使張仲武討殺迴鶻烏介可汗
至會昌末表請薊北立紀聖功銘帝詔遣宰臣李德裕
為之

後唐明宗天成二年十二月延宰臣於玄德殿馮道奏

曰先皇帝末年不撫軍民惑於聲樂遂致人怨幾墜不
構陛下自膺人望軍民惠愛藩后入覲情同魚水時歲
頻稔亦淳化所致也更愿居安思危保守今日帝然之
四年九月戊寅上御中興殿顧謂宰臣曰時事近日如
何馮道奏曰臣省事以來無歲不聞戰伐蓋政令不一
王綱弛紊伏自陛下纂隆五載服之以武威懷之以文
德任賢不二去邪不疑天下歸心人知恥格近歲以來
可謂無事

長興元年正月癸未上御中興殿謂宰臣曰近雖降春澤如何馮道奏曰今歲春初已見三白相次又降雨澤人情大洽蓋陛下聖德感通之應也臣聞天子事天臣下事君臣下若不供其職則刑法及之天子不守其道則災沴降之今陛下敬天事地憂勞百姓則歲有豐登二年十二月己卯帝御中興殿宰臣馮道奏曰臘日陛下方憂雪是夜便降立春日又降雨澤皆得其節也自陛下臨御于今六載家給人足而又放鷹鷂之類咸令


遂性所謂仁及鳥獸也苟非聖德其孰能臻此

三年三月癸巳帝御中興殿顧謂馮道曰春雨太多乎
道對曰春澤稍多是豐年之兆契丹孔熾自近朝以來
中國多事未暇制服向者王都背叛連結邊戎陛下命
將得人俾匹馬不回使其畏懼而修朝貢則知皇威所
振邁于前古也

周世宗顯德四年五月癸卯翰林學士兵部侍郎知詔
誥陶穀進紫芝白兔頌曰陛下嗣位之元年歲次甲寅

薄伐太原興六月之師定王業也虎賁振旅兵度孟津
汜水獻紫芝三莖暄暄分化惹度關之氣越三載歲在
丙辰親征淮夷破十萬之衆宣武功也戎輅旋軫途次
商唐潁州獻白兔一頭皎皎効質凝炤社之光謹案瑞
應圖曰王者恩霑行葦則紫芝秀五行傳曰國君德及
昆蟲則白兔馴上宴息之暇有時臨翫覩禎祥而修德善
馴擾之遂性三者昭萬物肇生之數白者叶太素返朴
之義芝為瑞也左盤右屈而自然成形兔之異也或白

或蒼亦不常其色豈可使曠代嘉瑞來者無聞今聖君
儉德罷露臺至仁祝踈羅重林衡不時之禁則草木茂
矣崇宗廟祔祭之禮則禽魚樂矣若然則朱草莫莢將
擢秀於庭際丹鳳麒麟豈空遊於郊藪下臣不佞再拜
作頌頌曰美哉靈草邈矣明視慶上帝之所臨昭王者
之嘉瑞考其祥稽其事芝為草也豈奪朱而効靈兔乃
獸焉取守黑而為異徵其薦瑞之日俱在迴鸞之次酌
物情順天意吾君當垂衣而治



冊府元龜卷三十七